

Izjava: Neplaćanje TV takse potkopava čitav Javni RTV sistem

“Prijetnja gospodina Milorada Dodika da će pozvati javnost da ne plaća RTV taksu je neodgovorna, neprincipijelna i samo može imati negativan uticaj na Javni RTV sistem u cjelini”, rekao je danas viši zamjenik visokog predstavnika Martin Ney. Viši zamjenik je reagovao na izjave sa jučerašnje konferencije za medije gdje je gospodin Dodik rekao da SNSD, stranka koju on vodi, razmišlja o pozivu na bojkot plaćanja RTV takse.

“Ovakve izjave lako mogu biti pogrešno shvaćene kao pokušaj političara da izvrše nedoličan politički uticaj na uređivačku politiku javnih emitera u zemlji, ne samo BHTV-a, već i RTRS-a i FTV-a koji se finansiraju iz istog sistema prikupljanja RTV takse”, naveo je ambasador Ney.

Nezavisni i profesionalni javni emiter je ključni stub demokratske države i jedan od dva preostala zahtjeva iz Studije izvodljivosti Evropske komisije. Bez ovoga BiH ne može da pređe u sljedeću fazu na putu ka evropskim integracijama. “Očekujem od odgovornih, evropski orijentisanih političara i partija da podrže vrijednosti i principe koji čine samu osnovu sistema vrijednosti Evropske unije, a to znači podrška nezavisnosti javnog RTV sistema”, dodao je Ney.

Prijedlozi zakona o javnom emitovanju, koji su trenutno pred parlamentom, sadrže veću decentralizaciju unutar sistema što znači bolju zastupljenost za sve dijelove BiH društva. “Ako ova zemlja želi jak i efikasan sistem javnog emitovanja koji može predstaviti i reflektovati kompleksnost bh. društva, tada bi se bh. političari trebali više potruditi da uvide da se pravne obaveze moraju poštivati, posebno kada je u pitanju osiguranje propisnog finansiranja Javnog RTV sistema kroz

efikasan sistem prikupljanja takse, kako je predviđeno u Zakonu o Javnom RTV sistemu”, zaključio je Ney.